

四庫全書

集部

欽定四庫全書

集部

古今詩刪卷十二

詳校官中書_臣李采

侍讀_臣孫球覆勘

總校官庶吉士_臣倉聖脈

校對官編修_臣盧燧

謄錄舉人_臣郭文銑

欽定四庫全書

古今詩刪卷十一

明 李攀龍 編

唐五言古詩

光上座廊下衆山五首

李頎

名嶽在廡下吾師居一牀
每聞楞伽徑只對清翠光
百谷聚雲色莓苔侵屋梁
氣盤古壁轉勢引幽壑長
願遊薜葉下日見金爐香

裴尹東溪別業

李頎

公才廊廟器官亞河南守別墅臨都門驚湍激前後舊
交與羣從十日一攜手幅巾望寒山長笑對高柳清歡
信可尚散吏亦何有岸雪青城陰水光遠林首閭觀野
人筏或飲川上酒幽雪淡徘徊白鷺飛左右庭竹垂臥
內村烟隔南阜始知物外情簪紱同芻狗

贈張旭

李頎

張公性嗜酒豁達無所營皓首窮草隸時稱太湖精露

頂據胡床長叫三五聲興來灑素壁揮筆如流星下舍
風蕭條寒草滿戶庭問家何所有生事但浮萍左手持
蟹螯右手執丹經瞪目視霄漢不知醉與醒諸賓且方
坐旭日臨東城荷葉裏江魚白甌貯香粳微祿心不屑
放神於八紘時人不識者即是安期生

送綦母三謁房給事

李頎

夫子大名下家無鍾石儲惜哉湖海上曾校蓬萊書外
物非本意此生空淡如所思但乘興遠適維單車高道

時坎坷故交願吹噓徒言青瑣闥不愛承明廬
百里人戶滿片言諍訟疎手持蓮花經目送飛鳥餘
晚景南路別炎雲中伏初此行倘不遂歸食蘆洲魚

昭君墓

常建

漢宮豈不死異域傷獨沒萬里馱黃金蛾眉為枯骨
迴車夜出塞立馬皆不發共恨丹青人墳上哭明月

宿王昌齡隱居

常建

清溪深不測隱處唯孤雲松際露微月清光猶為君
茅

亭宿花影藥院滋苔紋余亦謝時去西山鸞鶴羣

江上琴興

常建

江上調玉琴一絃清一心泠泠七絃遍萬木徵幽陰能使江月白又令江水深始知枯桐枝可以徵黃金

送李十一尉臨溪

常建

泠泠花下琴君唱渡江吟天際一帆影預懸離別心以言神仙尉因致瑤華音回軫撫商調越溪澄碧林

晦日馬鐙曲稍次中流作

常建

夜寒宿蘆葦晚色明西林初日在川上便澄游子心晴
天無纖翳郊野浮春陰波靜隨釣魚舟小綠水深出浦
見千里曠然諧遠尋扣舷應漁父因唱滄浪吟

西山
常建

一身為輕舟落日西山際常隨去帆影遠接長天勢物
象歸餘清林巒分夕麗亭亭碧流暗日入孤霞繼洲渚
遠陰映湖雲尚明霽林昏楚色來岸遠荆門閉至夜轉
清迥蕭蕭北風厲沙邊鴈鷺泊宿處蒹葭蔽圓月逗前

浦孤琴又搖曳冷然夜遂深白露沾人袂

宋中五首

高適

梁王昔全盛賓客復多才悠悠一千年陳跡唯高臺寂
寞向秋草悲風千里來

其二

朝臨孟諸上忽見芒碭間赤帝終已矣白雲長不還時
清更何有禾黍徧空山

其三

景公德何廣臨變莫能欺三請皆不忍妖星終自移君
心本如此天道豈無知

其四

梁苑白日暮梁山秋草時君王不可見脩竹令人悲九
月桑葉盡寒風鳴樹枝

其五

登高臨舊國懷古對窮秋落日鴻鴈度寒城砧杵愁昔
賢不復有行矣莫淹留

同韓四薛三東亭翫月

高適

遠游悵不樂茲賞吾道存款曲故人意辛勤清夜言東
亭何寥寥佳境無朝昏堦墀近洲渚戶牖當郊原矧乃
窮周旋況復怡討論樹陰蕩瑤琴月氣延清樽明月帶
飛鴈野火連荒村對此更愁予悠哉懷故園

同諸公登慈恩寺塔

高適

香界泯羣有浮圖豈諸相登臨駭孤高披拂忻大壯言
是羽翼生迥出空虛上頓疑身世別乃覺形神王宮闕

皆戶前山河盡簷向秋風昨夜至秦塞多清曠千里何
蒼蒼五陵鬱相望盛時慚阮步末宦知周防翰効獨無
因斯焉可游放

同薛司直諸公秋霽曲江俯見南山作

高適

南山鬱初霽曲江湛不流若臨瑤池間想望崑崙丘迴
首見黛色渺然波上秋深沉俯崢嶸清淺延阻修連潭
萬木影插岸千巖幽香藹信難測淵淪無暗投片雲對
漁父獨鳥隨虛舟我心寄青霞世事慙白鷗得意在乘

興忘懷非外求良辰自多暇忻與數子游

暮秋山行

岑參

疲馬臥長坂夕陽下通津山風吹空林颯颯如有人蒼
旻霽涼雨石路無飛塵千念集暮節萬籟悲蕭辰鷓鴣
昨夜鳴蕙草色已陳況在遠行客自然多苦辛

與高適薛據同登慈恩寺浮圖

岑參

塔勢如湧出孤高聳天宮登臨出世界磴道盤虛空突
兀壓神州崢嶸如鬼工四角礙白日七層摩蒼穹下窺

指高鳥俯聽聞驚風連山若波濤奔走似朝東青槐夾
馳道宮觀何玲瓏秋色從西來蒼然滿關中五陵北原
上萬古青濛濛淨理了可悟勝因夙所宗誓將挂冠去
覺道資無窮

東歸發捷為至泥溪舟中作

岑參

前日解侯印泛舟歸山東平旦發捷為逍遙信回風七
月江水大滄波漲秋空復有峨眉僧誦經在舟中夜泊
防虎豹朝行逼魚龍一道鳴迅湍兩邊走連峯猿拂岸

花落烏啼岩樹重烟藹吳楚連汴沿湖海通憶昨在西
掖復曾入南宮日出朝聖人端笏陪羣公不意今棄置
何由豁心胸吾當海上去且學乘槎翁

秋夜聽羅山人彈三峽流泉

岑參

皤皤岷山老抱琴鬢蒼然衫袖拂玉徽為彈三峽泉此
曲彈未半高堂如空山石林何颼颼忽在窗戶間繞指
弄鳴咽青絲激潺湲演漾怨楚雲虛徐韻秋烟疑兼陽
臺雨似雜巫山猿幽引鬼神聽淨令耳目便楚客腸欲

斷湘妃淚斑斑誰裁青桐枝絀以朱絲絃能含古人曲
遞與今人傳知音難再逢惜君方老年曲終月已落惆
悵東齋眠

北庭贈宗學士道別

岑參

萬事不可料嘆君在軍中讀書破萬卷何事來從戎曾
逐李轻車征西出太蒙荷戈月窟外擐甲崑崙東兩度
皆破胡朝廷輕戰功十年抵一命萬里如飄蓬容鬢老
胡塵衣裘脆邊風忽來輪臺下相見披心胸飲酒對春

草彈棋聞夜鐘
今日還龜茲
臂上懸角弓
平沙向旅館
匹馬隨飛鴻
孤城倚大磧
海氣迎邊空
四月猶自寒
天山雪濛濛
君有賢主將
何謂泣途窮
時來整六翮
一舉凌蒼穹

浮石瀨

劉長卿

秋月照瀟湘
月明聞盪槳
石橫晚瀨急
水落寒沙廣
衆嶺猿嘯重
空江人語響
清輝朝復暮
如待扁舟賞

陪元侍御游支硎寺

劉長卿

支公去已久寂寞龍華會古木閉空山蒼然暮相對林
巒非一狀水石有餘態密竹藏晦明羣峯爭向背峯峯
帶落日步步入青靄香氣空翠中猿聲暮雲外留連南
臺客想像西方內因逐溪水還觀心兩無礙

杪秋南山西峯題準上人蘭若

錢起

向山看霽色步步豁幽性反照亂流明寒空千嶂靜石
門有餘好霞殘月欲映上詣遠公廬孤峯懸一徑雲裏
隔窗火松間下山磬客到兩忘言猿心與禪定

李祭酒別業俯視川林前帶雷岫

錢起

南山轉羣木昏曉擁山翠
小澤近龍居青蒼常雨氣
君家北原上千金買勝事
丹闕退朝迴白雲迎賞至
新晴村落外處處烟景異
片水明斷崖餘霞入古寺
東臯指歸翼月盡有餘意

效陶彭澤

韋應物

霜落悴百草時菊獨妍華
物性有如此寒暑其奈何
撥英泛濁醪日入會田家
盡醉茅簷下一生豈在多

幽居 韋應物

貴賤雖異等出門皆有營
獨無外物牽遂此幽居情
微雨夜來過不知春草生
青山忽已曙鳥雀繞舍鳴
時與道人偶或隨樵者行
自當安蹇劣誰謂薄世榮

寄全椒山中道士 韋應物

今朝郡齋冷忽念山中客
澗底束荆薪歸來煮白石
欲持一尊酒遠慰風雨夕
落葉滿空山何處尋行跡

淮上即事寄廣陵親故 韋應物

前舟已渺渺欲度誰相待秋山起暮鐘楚雨連滄海風
波離思滿宿昔容鬢改獨鳥下東南廣陵何處在

同德寺雨後寄元侍御李博士

韋應物

川上風雨來須臾滿城闕岩窈青蓮界蕭條孤興發前
山遽已淨陰靄夜來歇喬木生夏涼流雲吐華月巖城
自有限一水非難越相望曙河遠高齋坐超忽

南國陪王卿游曠

韋應物

形跡雖拘檢世事澹無心郡中多山水日夕聽幽禽几

閣文墨暇園林春景深雜花芳意散綠池暮色深君子
有高躅相攜在幽尋一酌何為貴可以寫沖襟

京郊

韋應物

吏舍跼終年出郊曠清曙楊柳散和風青山澹吾慮依
叢適自憇緣澗還復去微雨靄芳原春鳩鳴何處樂幽
心屢止遵事跡猶遽終罷斯結廬慕陶真可庶

藍嶺精舍

韋應物

石壁精舍高排雲聊直上佳遊愜始願忘險得前賞崖

傾景方晦谷轉川如掌綠林含蕭條飛閣起弘敞道人
上方至深夜還獨往日落羣山陰天秋百泉響所嗟累
已成安得長偃仰

田家三首

柳宗元

蓐食狗所務驅牛向東阡鷄鳴村巷白夜色歸暮田札
札耒耜聲飛飛來烏鳶竭茲筋力事特用窮歲年盡輸
助徭役聊就空自眠子孫日已長世世還復然

其二

古道饒蒺藜縈迴古城曲蓼花被堤岸陂水寒更綠是
時收穫竟落日多樵牧風高榆柳疎霜重梨棗熟行人
迷去住野鳥競栖宿田翁笑相念昏黑慎原陸今年幸
少豐無厭饘與粥

其三

籬落隔烟火農談四隣夕庭際秋蟲鳴疎麻方寂歷蠶
絲盡輸稅機杵空倚壁里胥夜經過雞黍事筵席各言
官長峻文字多督責東鄉後租期車轂陷泥澤公門少

推怨鞭朴恣狼藉努力慎經營肌膚真可惜迎新在此
歲唯恐踵前跡

南礪中題

柳宗元

秋氣集南礪獨游亭午時迴風一蕭瑟林影久參差始
至若有得稍遠遂忘疲羈禽響幽谷寒藻舞淪漪去國
魂已游懷人空淚垂孤生易為感失路少所宜索寞竟
何事徘徊只自知誰為後來者當與此心期

入若耶溪

崔灝

輕舟去何疾已到雲林境起坐魚鳥間動搖山水影
岩中響自答溪裏言彌靜事事令人幽停橈向餘景

贈輕車

崔灝

悠悠遠行歸經春涉長道幽冀桑始青洛陽蠶欲老
憶昨成馬地別時心草草烽火從北來邊城閉常早
平生少相遇未得展懷抱今日杯酒間見君交情好

古塞下曲

陶翰

進軍飛狐北窮寇勢將變日落塵沙昏背河更一戰
驛

馬黃金勒彫弓白羽箭射殺左賢王歸奏未央殿欲言
塞下事天子不召見東出咸陽門哀哀淚如霰

早過臨淮

陶翰

夜來三渚風晨過臨淮島潮中海氣白城上楚雲早鱗
鱗漁浦帆潏潏蘆洲草川路日浩蕩怒焉心如擣且言
任倚伏何暇念枯槁范子名屢移遽公志尚抱古人已
云去此理今難道

山下晚晴

崔曙

寥寥遠天靜溪路何空濛斜光照疎雨秋氣生白虹雲
盡山色暝蕭條西北風故林歸宿處一葉下梧桐

潁陽東溪懷古

崔曙

靈溪氛霧歇皎鏡清心顏空色不映水秋聲多在山世
人久疎曠萬物皆自閑白鷗寒更浴孤雲晴未還昔時
讓王者此地閑玄關無以躡高步淒涼岑壑間

發文崖山還太室作

崔曙

東林氣微白寒鳥急高翔吾亦自茲去北山歸草堂仲

冬正三五日月遙相望肅肅過潁上
龍龍辨夕陽川冰生積雪野火出
枯桑獨往路難盡窮陰人易傷傷
此無衣客如何蒙雨霜

宿大通和尚塔敬贈如閣黎廣心
長孫錡二山

人
崔曙

丈公已寂滅塔影山上古更有真
僧來道場救諸苦一承微妙法寓
宿清淨土身心能自新色相了無
取森森松映月漠漠雲近戶嶺外
飛電明夜來前山雨燃燈見

棲鶴作禮聞信鼓曉霽南軒開秋華淨天宇願言長出世謝爾及申甫

題鶴林寺

蔡母潛

道門隱形勝向背臨層霄松覆山殿冷花藏溪路遙珊瑚寶旛挂焰焰明燈燒遲日半空谷春風連上潮少憑水木興暫忝身心調願謝攜手客茲山禪誦饒

雜詩

崔國輔

逢著平樂兒論交鞍馬前興酣一斗酒恰用十千錢後

余在關內作事多迍邐何肯相救援徒聞寶劍篇

贈裴九侍御昌江草堂彈琴

崔國輔

朔風吹疎竹積雪在嵯嶇鳴琴草堂響小澗清且淺
沉吟東山意欲去芳歲晚悵望黃綺心白雲若的眼

江南曲五首

丁仙芝

長干斜路北近浦是兒家有意來相訪明朝出浣紗

其二

發向橫塘口船開值急流知郎舊時意且請攏船頭

其三

昨暝逗南陵風聲波浪阻入浦不逢人歸家誰信汝

其四

未眠已成粧乘潮去茫茫因從京口渡使報邵陵王

其五

始下芙蓉樓言發瑯琊岸急為打船開惡許傍人見

和薦福寺英公新構禪堂

丁仙芝

上人久棄世中道自忘筌寂照出羣有了心清衆緣所

以於此地築館開青蓮果藥羅砌下朝虹垂戶前
呪中灑甘露指處流香泉神遠日無事體清宵不眠
枳聞廬山法松入漢陽禪一枕四山外虛舟常浩然

關山月

司空曙

蒼茫明月上夜久光如積野漠冷胡霜闕樓宿邊客
隴頭秋露暗磧外寒沙白唯有故鄉人霑裳此聞笛

塞上二首

戎昱

慘慘寒日沒北風捲蓬根將軍領疲兵却入古塞門
迴

首指陰山殺氣成黃雲

其二

樓上畫角哀即知兵心苦試問左右人無言淚如雨何
意休明時終年事鼙鼓

赴京初入汴口曉景即事寄兵部李郎中

杜牧

清淮控隋漕北走長安道檣形櫛櫛斜浪態迤迤好初
旭紅可染明河澹如掃澤濶鳥來遲村飢人語早露蔓
蟲絲多風蒲燕雛老秋思高蕭蕭客愁長裊裊因懷京

洛間宦游何草草什伍持津梁
瀕湧爭追討翺便詎可
尋祕幾安能考小人乏馨香
上下將何禱唯有君子心
顯豁知幽抱

塞下曲

薛奇童

驕虜初南下烟塵暗國中
獨召李將軍夜開甘泉宮一
身許明主萬里總元戎
霜甲臥不煖夜半聞邊風胡天
早飛雪芳檄多轉蓬
寒雲覆水重秋氣連海空
金鞍誰家子上馬鳴角弓
自是幽并客非論愛立功

從軍行

杜頤

秋草馬蹄輕角弓持弦急去為龍城侯正值胡兵襲軍
氣橫大荒戰酣日將入長風金鼓動白露鐵衣濕四起
愁邊聲南轅時佇立斷蓬孤自轉寒雁飛相及萬里雲
沙漲路平冰霰澁夜聞漢使歸獨向刀環泣

古今詩刪卷十一

欽定四庫全書

古今詩刪卷十二

明 李攀龍 編

唐七言古詩

滕王閣 王勃

滕王高閣臨江渚
珮玉鳴鸞罷歌舞
畫棟朝飛南浦雲
朱簾暮捲西山雨
閒雲潭影日悠悠
物換星移幾度秋
閣中帝子今何在
檻外長江空自流

長安古意

盧照隣

長安大道連狹斜，青牛白馬七香車。
玉簪縱橫過主第，金鞍絡繹向侯家。
龍銜寶蓋承朝日，鳳吐流蘇帶晚霞。
百丈遊絲爭遶樹，一羣嬌鳥共啼花。
啼花戲蝶千門側，碧樹銀臺萬種色。
複道交窗作合歡，雙闕連甍垂鳳翼。
梁家畫閣天中起，漢帝金臺雲外直。
樓前相望不相知，陌上相逢詎相識。
借問吹簫向紫烟，曾經學舞度芳年。
得成比目何辭死，願作鴛鴦不羨仙。
比目鴛鴦真可羨，

雙去雙來君不見生憎帳額繡孤鸞好取雙簾帖雙燕
雙燕雙飛繞畫梁羅幃翠被鬱金香片片行雲著蟬鬢
纖纖初月上鴉黃鴉黃粉白車中出含嬌含態情非一
妖童寶馬鐵連錢娼妓盤龍金屈膝御史府中烏夜啼
廷尉門前雀欲栖隱隱朱城臨玉道遙遙翠幃沒金堤
挾彈飛鷹杜陵北探丸借客渭橋西俱邀俠客芙蓉劍
共宿娼家桃李蹊娼家日暮紫羅裙清歌一轉口氤氲
北堂夜夜人如月南陌朝朝騎似雲南陌北堂連北里

五劇三條控三市弱柳青槐拂地垂佳氣紅塵暗天起
漢代金吾千騎來翡翠屠蘇鸚鵡杯羅襦寶帶為君解
燕歌趙舞為君開別有豪華稱將相轉日回天不相讓
意氣由來排灌夫專權判不容蕭相專權意氣本豪雄
青虬紫燕坐生風自言歌舞長千載自謂驕奢凌五公
節物風光不相待桑田碧海須臾改昔時金階白玉堂
即今惟見青松在寂寂寥寥楊子居年年歲歲一床書
獨有南山桂花發飛來飛去襲人裾

帝京篇

駱賓王

山河千里國城闕九重門不睹皇居壯安知天子尊皇
居帝里峻函谷鶉野龍山侯甸服五緯連影集星躔八
水分流橫地軸秦塞重關一百二漢家離宮三十六桂
殿嶽崙對玉樓椒房窈窕連金屋三條九陌麗城隈萬
戶千門平旦開複道斜通塢鵲觀交衢直指鳳凰臺劍
履南宮入簪纓北闕來聲名冠寰宇文物象昭回鈎陳
肅蘭彫壁沼浮槐市銅羽應風迴金莖承露起校文天

祿閣習戰昆明水朱邸抗平臺黃扉通戚里平臺戚里
帶崇墉炊金饌玉待鳴鐘小堂綺帳三千戶大道青樓
十二重寶蓋雕鞍金絡馬蘭窗繡柱玉盤龍繡柱璇題
粉壁映鏤金鳴玉玉侯盛王侯貴人多近臣朝遊北里
暮南隣陸賈分金將燕喜陳遵投轄正留賓趙李經過
密蕭朱交結親丹鳳朱城白日暮青牛紺幘紅塵度俠
客朱彈垂楊道娼婦銀鈎採桑路娼家桃李自芳菲京
華游俠事輕肥延年女弟雙鳳入羅敷使君千騎歸同

心結縷帶連理織成衣春朝桂尊尊百味秋夜蘭燈燈
九微翠幌珠簾不獨映清歌寶瑟自相依且論三萬六
千是寧知四十九年非古來名利若浮雲人生倚伏信
難分始見田實相移奪俄聞衛霍有功勲未厭金陵氣
先開石槨文朱門無復張公子灞亭誰畏李將軍相顧
百齡皆有待居然萬化咸應改桂枝芳氣已銷亡栢梁
高宴今何在春去春來苦自馳爭名爭利徒爾為久留
郎署終難遇空掃相門誰見知當時一旦擅豪華自言

千載長驕奢，倏忽搏風生。羽翼須臾失，浪委泥沙黃。雀
徒巢桂青門，遂種瓜黃金。銷鑠素絲變，一貴一賤交情
見。紅顏夙昔白，頭新脫粟布衣輕。故人故人有，湮淪新
知無。意氣灰死，韓安國羅傷。翟廷尉已矣哉！歸去來馬
卿辭蜀多文藻，揚雄仕漢乏良媒。三冬自矜誠足用，十
年不調幾遭迴。汲黯薪逾積，孫弘閣未開。誰識長沙傳，
獨負洛陽才。

代悲白頭翁

劉庭芝

洛陽城東桃李花飛來飛去落誰家洛陽女兒惜顏色
行逢落花長嘆息今年花落顏色改明年花開復誰在
已見松柏推為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言全盛紅顏子應憐半死白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺開錦繡將軍樓閣盡神仙一朝臥病無相識
三春行樂在誰邊宛轉蛾眉能幾時須臾鶴髮亂如絲

但看古來歌舞地惟有黃昏鳥雀悲

公子行

劉庭芝

天津橋下陽春水天津橋上繁華子
馬聲迴合青雲外人影搖動綠波裏
綠波蕩漾玉為砂青雲離披錦作霞
可憐楊柳傷心樹可憐桃李斷腸花
此日遨遊邀美女此時歌舞入娼家
娼家美女鬱金香飛去飛來公子傍
的的朱簾白日映娥娥玉顏紅粉妝
花際徘徊雙蛺蝶池邊顧步兩鴛鴦
傾國傾城漢武帝為雲為雨楚襄王

古來容光人所羨，況復今日遙相見。
願作輕羅著細腰，願為明鏡分嬌面。
與君相向轉相親，與君雙栖共一身。
願作貞松千歲古，誰論芳槿一朝新。
百年同謝西山日，千秋萬古北邙塵。

古意

沈佺期

八月涼風動高閣，千金麗人捲綃幕。
已憐池上歇芳菲，不念君恩坐搖落。
世上榮華如轉蓬，朝隨阡陌暮雲中。
飛燕侍寢昭陽殿，班姬飲恨長信宮。
長信宮昭陽殿春

來歌舞妾自知秋至容華君不見昔時羸女厭世氛學
吹鳳簫乘綵雲含情轉盼向簫史千載紅顏持贈君

明河篇

宋之問

八月涼風天氣清萬里無雲河漢明昏見南樓清且淺
曉落西山縱復橫洛陽城關天中起長河夜夜千門裏
複道連甍共蔽虧畫堂瓊戶特相宜雲母帳前初泛濫
水晶簾外轉逶迤倬彼昭回如練白復出東城接南陌
南陌征人去不歸誰家今夜擣寒衣鴛鴦機上疎螢度

烏鵲橋邊一鴈飛
鴈飛螢度愁難歇
坐見明河漸微沒
已能舒卷任浮雲
不惜光輝讓流月
明河可望不可親
願得乘槎一問津
更將織女支機石
還訪成都賣卜人

下山歌

宋之問

下嵩山兮多所思
攜佳人兮步遲遲
松間明月長如此
君再遊兮復何時

至瑞州驛見杜五審言沈三仝期間五朝隱王
二無競題壁慨然成咏

宋之問

逐臣北地承嚴譴謂到南中每相見豈意南中岐路多
千山萬水分鄉縣雲搖雨散各翻飛海濶天長音信稀
處處山川同瘴癘自憐能得幾人歸

飲馬長城窟行

王翰

長安少年無遠圖一生惟羨執金吾麒麟殿前拜天子
走馬為君西擊胡胡沙獵獵吹人面漢虜相逢不相見
遙聞鐘鼓動地來傳道單于夜猶戰此時顧恩寧顧身
為君一行推萬人壯士揮戈迴白日單于濺血污朱輪

歸來飲馬長城窟長城道傍多白骨問之耆老何代人
云是秦王築城卒黃昏塞北無人烟鬼哭啾啾聲沸天
無罪見誅功不賞孤魂流落此城邊當昔秦王按劍起
諸侯膝行不敢視富國強兵二十年築怨聲冤九千里
秦王築城何太愚天實亡秦非北胡一朝禍起蕭牆內
渭水咸陽不復都

山陰縣西樓

孫逖

都邑西樓芳樹間逶迤霽色遶江山山月夜從公署出

江雲晚對訟庭還誰知春色朝朝好二月飛花滿江草
一見湖邊楊柳風遙憶青青洛陽道

烏夜啼

李白

黃雲城邊烏欲棲歸飛啞啞枝上啼機中織錦秦川女
碧紗如烟隔窗語停梭悵然憶遠人獨宿空房淚如雨

採蓮曲

李白

若耶溪傍採蓮女笑隔荷花共人語日照新粧水底明
風飄香袂空中舉岸上誰家遊冶郎三三五五映垂楊

紫駟嘶入落花去見此踟躕空斷腸

獨漉篇

李白

獨漉水中泥水濁不見月不見月尚可水深行人沒越
鳥從南來胡鷹亦北渡我欲彎弓向天射惜其中道失
歸路落葉別樹飄零隨風客無所托悲與此同羅幃舒
卷似有人開明月直入無心可猜雄劍挂壁時時龍鳴
不斷犀象繡滋苔生國恥未雪何由成名神鷹夢澤不
顧鴟鵂為君一擊鵬搏九天

將進酒

李白

君不見黃河之水天上來奔流到海不復回又不見高
堂明鏡悲白髮朝如青絲暮如雪人生得意須盡歡莫
使金樽空對月天生我材必有用千金散盡還復來烹
羊宰牛且為樂會須一飲三百杯岑夫子丹丘生進酒
君莫停與君歌一曲請君為我側耳聽鐘鼓饌玉不足
貴但願長醉不長醒古來聖賢皆寂寞惟有飲者留其
名陳王昔日宴平樂斗酒十千恣歡謔主人何為言少

錢徑須沽取對君酌
五花馬千金裘呼兒將出換美酒
與爾同消萬古愁

江上吟

李白

木蘭之枻沙棠舟
玉簫金管坐兩頭
美酒樽中置千斛
載妓隨波任去留
仙人有待乘黃鶴
海客無心隨白鷗
屈平詞賦懸日月
楚王臺榭空山丘
興酣落筆搖五嶽
詩成笑傲凌滄洲
功名富貴若長在
漢水亦應西北流

鳴皋歌送岑徵君

李白

若有人兮思鳴皋阻積雪兮心煩勞洪河凌競不可以
徑度冰龍鱗兮難容舳邈仙山之峻極兮聞天籟之嘈
嘈霜崖縞皓以合沓兮若長風扇海湧滄溟之波濤玄
猿綠羆舐啖崖岌危柯振石駭膽慄魄羣呼而相號峯
崢嶸以路絕挂星辰於岩竅送君之歸兮動鳴皋之新
作交鼓吹兮彈絲觴清冷之池閣君不行兮何待若反
顧之黃鵠掃梁園之羣英振大雅於東洛巾征軒兮歷
阻折尋幽居兮越巘嶠盤白石兮坐素月琴松風兮寂

萬壑望不見兮心氛氲蘿冥冥兮霰紛紛水橫洞以下
淥波小聲而上聞虎嘯谷而生風龍藏溪而吐雲寡鶴
清唳飢鶻嘖呻魂獨處此幽默兮愀空山而愁人雞聚
族而爭食鳳孤飛而無隣蜺蜺嘲龍魚目混珍嫫母衣
錦西施負薪若使巢由桎梏於軒冕兮亦奚異乎夔龍
蹠躡於風塵哭何苦而救楚笑何誇而却秦吾誠不能
學二子沽名矯節以耀世兮固將棄天地而遺身白鷗
兮飛來長與君兮相親

金陵酒肆留別

李白

風吹柳花滿店香
吳姬壓酒勸君嘗
金陵子弟來相送
欲行不行各盡觴
請君試問東流水
別意與之誰短長

贈裴十四

李白

朝見裴叔則
朗如行玉山
黃河落天走
東海萬里寫
入胸懷間
身騎白黿不敢渡
金高南山買君顧
徘徊六合無相知
飄若浮雲且西去

貧交行

杜甫

翻手作雲覆手雨紛紛輕薄何須數君不見管鮑貧時
交此道今人棄如土

折檻行

杜甫

嗚呼房魏不復見秦王學士時難羨青衿胄子困泥塗
白馬將軍若雷電千載少似朱雲人至今折檻空嶙峋
婁公不語宋公語尚憶先皇容直臣

朱鳳行

杜甫

君不見瀟湘之山衡山高山巔朱鳳聲嗷嗷側身長顧

求其曹翅垂口噤心甚勞下憇白鳥在羅網黃雀最少
雖難逃願分竹實及螻蟻盡使鳴梟相怒號

越王樓歌

杜甫

綿州州府何磊落顯慶年中越王作孤城西北起高樓
碧瓦朱甍照城郭樓下長江百丈清山頭落日半輪明
君王舊跡今人賞轉見千秋萬古情

秋風

杜甫

秋風淅淅吹我衣東流之外西日微天晴小城擣練急

石古細路行人稀不知明月為誰好
早晚孤帆他夜歸
會將白髮倚庭樹故園池臺今是非

夜聞簫策

杜甫

夜聞簫策滄江上哀年側耳情所向
隣舟一聽多感傷
塞曲三更歛悲壯積雪飛霜此夜寒
孤燈急管復風湍
君知天地干戈滿不見江湖行路難

短歌行贈王郎司直

杜甫

王郎酒酣拔劔斫地歌莫哀我能拔
爾抑塞磊落之奇

才豫樟翻風白日動鯨魚跋浪滄溟開且脫劒佩休徘徊西得諸侯棹錦水欲向何門跂珠履仲宣樓頭春色深青眼高歌望吾子眼中之人吾老矣

玄都壇寄元逸人

杜甫

故人昔隱東蒙峯已佩含景蒼精龍故人今居子午谷獨在陰厓結茆屋屋前太古玄都壇青石漠漠常風寒子規夜啼山竹裂王母晝下雲旗翻知君此計成長往芝草琅玕日應長錢鏐高垂不可攀致身福地何蕭爽

莫相疑行

杜甫

男兒生無所成頭皓白牙齒欲落真可惜憶獻三賦蓬
萊宮自怪一日聲輝赫集賢學士如堵牆觀我落筆中
書堂往時文彩動人主此日飢寒趨路傍晚將末契托
年少當面輸心背面笑寄謝悠悠世上兒不爭好惡莫
相疑

高都護驄馬行

杜甫

安西都護胡青驄聲價煥然來向東此馬臨陣久無敵

與人一心成大功功成惠養隨所致飄飄遠自流沙至
雄姿未受伏櫪恩猛氣猶思戰場利腕促蹄高如踣鋌
交河幾蹴層冰裂五花散作雲滿身萬里方看汗流血
長安壯兒不敢騎走過掣電傾城知青絲絡頭為君老
何由却出橫門道

送孔巢父謝病歸遊江東兼呈李白

杜甫

巢父掉頭不肯住東將入海隨烟霧詩卷長留天地間
釣竿欲拂珊瑚樹深山大澤龍蛇遠春寒野陰風景暮

蓬萊織女迴龍車指點虛無引歸路自是君身有仙骨
世人那得知其故惜君只欲苦死留富貴何如草頭露
蔡侯靜者意有餘清夜置酒臨前除罷琴惆悵月照席
幾歲寄我空中書南尋禹穴見李白道甫問信今何如

哀江頭

杜甫

少陵野老吞聲哭春日潛行曲江曲江頭宮殿鎖千門
細柳新蒲為誰綠憶昔霓旌下南苑苑中萬物生顏色
昭陽殿裏第一人同輦隨君侍君側輦前才人帶弓箭

白馬嚼齧黃金勒翻身向天仰射雲一箭正墜雙飛翼
明眸皓齒今何在血污遊魂歸不得清渭東流劒閣深
去住彼此無消息人生有情淚沾臆江水江花豈終極
黃昏胡騎塵滿城欲往城南忘南北

樂遊園歌

杜甫

樂遊古園萃森爽烟綿碧草萋萋長公子華筵勢最高
秦川對酒平如掌長生木瓢示真率更調鞍馬狂歡賞
青春波浪芙蓉園白日雷霆夾城仗閭闔晴開映蕩蕩

曲江翠幕排銀榜拂水低垂舞袖翻緣雲清切歌聲上
却憶年年人醉時只今未醉已先悲數莖白髮那拋得
百罰深杯亦不辭聖朝亦知賤士醜一物自荷皇天慈
此身欲罷無歸處獨立蒼茫自咏詩

飲中八仙歌

杜甫

知章騎馬似乘船眼花落井水底眠汝陽三斗始朝天
道逢麴車口流涎恨不移封向酒泉左相日興費萬錢
飲如長鯨吸百川銜杯樂聖稱避賢宗之瀟灑美少年

舉觴白眼望青天，皎如玉樹臨風前。
蘇晉長齋綉佛前，醉中往往愛逃禪。
李白一斗詩百篇，長安市上酒家眠。
天子呼來不上船，自稱臣是酒中仙。
張旭三杯草聖傳，脫帽露頂王公前。
揮毫落紙如雲烟，焦遂五斗方卓然。
高談雄辯驚四筵。

駿馬行

杜甫

鄧公馬癖人共知，初得花驄大宛種。
夙昔傳聞思一見，牽來左右神皆竦。
雄姿逸態何嘗卒，顧影驕嘶自矜寵。

隅目青瑩夾鏡懸肉駿礪礪連錢動朝來少試華軒下
未覺千金滿高價赤汗微生白雪毛銀鞍却覆香羅帕
卿家舊物公能取天廐真龍此其亞晝洗須騰涇渭深
朝趨可刷幽并夜吾聞良驥老始成此馬數年人更驚
豈有四蹄疾於鳥不與八駿俱先鳴時俗造次那得致
雲霧晦冥方降精近聞下詔宣都邑肯使騏驎地上行

哀王孫

杜甫

長安城頭頭白烏夜飛延秋門上呼又向人家啄大屋

屋底達官走避胡金鞭斷折九馬死骨肉不得同馳驅
腰下寶玦青珊瑚可憐王孫泣路隅問之不肯道姓名
但道困苦乞為奴已經百日竄荆棘身上無有完肌膚
高帝子孫盡隆準龍種自與常人殊豺狼在邑龍在野
王孫善保千金軀不敢長語臨交衢且為王孫立斯須
昨夜春風吹血腥東來索駝滿舊都朔方健兒好身手
昔何勇銳今何愚竊聞太子已傳位聖德北服南單于
花門虜面請雪恥慎勿出口他人狙哀哉王孫慎勿疎

五陵佳氣無時無

蘇端薛復筵簡薛華醉歌

杜甫

文章有神交有道端復得之名譽早愛客滿堂盡豪傑
開筵上日思芳草安得健步移遠梅亂插繁花向晴昊
千里猶殘舊冰雪百壺且試開懷抱垂老惡聞戰鼓悲
急觴為緩憂心擣少年努力縱談笑看我形容已枯槁
座中薛華善醉歌歌辭自作風格老近來海內為長句
汝與山東李太白好何劉沈謝力未工才兼鮑照愁絕倒

諸生頗盡新知樂萬事終傷不自保氣酣日落西風來
願吹野水添金杯如澠之酒常快意亦知窮愁安在哉
忽憶雨時秋并塌古人白骨生青苔如何不飲令心哀

漢陂行

杜甫

岑參兄弟皆好奇攜我遠來遊漢陂天地點慘忽異色
波濤萬頃堆琉璃琉璃汗漫泛舟入事殊興極憂思集
鼉作鯨吞不復知惡風白浪何嗟及主人錦帆相為開
舟子喜甚無氛埃鳬鷺散亂棹謳發絲管啁啾空翠來

沈竿續蔓深莫測菱葉荷花淨如拭宛在中流渤澥清
下歸無極終南黑半陂已南純浸山影動裊宛冲融間
船舷暝戩雲際寺水面月出藍田關此時驪龍亦吐珠
馮夷擊鼓羣龍趨湘妃漢女出歌舞金支翠旗光有無
咫尺但愁雷雨至蒼茫不曉神靈意少壯幾時奈老何
向來哀樂何其多

奉先劉少府新畫山水障歌

杜甫

堂上不合生楓樹怪底江山起烟霧聞君掃却赤縣圖

乘興遣畫滄洲趣畫師亦無數好手不可遇對此融心
神知君重毫素豈但祁岳與鄭虔筆跡遠過楊契丹得
非玄圃裂無乃瀟湘翻悄然坐我天姥下耳邊已似聞
清猿反思前夜風雨急乃是蒲城鬼神入元氣淋漓障
猶濕真宰上訴天應泣野亭春還雜花遠漁翁暝踏孤
舟立滄浪水深清溟濶歎岸側島秋毫末不見湘妃鼓
瑟時至今斑竹臨江活劉侯天機精愛畫入骨髓自有
兩兒郎揮灑亦莫比大兒聰明到能添老樹巔崖裏小

兒心孔開貌得山僧及童子若耶溪雲門寺吾獨胡為
在泥滓青鞋布襪從此始

韋諷錄事宅觀曹將軍畫馬圖引

杜甫

國初以來畫鞍馬神妙獨數江都王將軍得名三十載
人間又見真乘黃曾貌先帝照夜白龍池十日飛霹靂
內府殷紅瑪瑙盤婕妤傳詔才人索盤賜將軍拜舞歸
輕紈細綺相追飛貴戚權門得筆跡始覺屏障生光輝
昔日太宗拳毛騮近時郭家獅子花今之新圖有二馬

復令識者久嘆嗟此皆騎戰一敵萬縞素漠漠開風沙
其餘七疋亦殊絕迥若寒空動烟雪霜蹄蹴踏長楸間
馬官廨養森成列可憐九馬爭神駿顧視清高氣深穩
借問苦心愛者誰後有韋諷前支遁憶昔巡幸新豐宮
翠華拂天來向東騰驤磊落三萬疋皆與此圖筋骨同
自從獻寶朝河宗無復射蛟江水中君不見金粟堆前
松柏裏龍媒去盡鳥呼風

丹青引贈曹將軍霸

杜甫

將軍魏武之子孫於今為庶為清門英雄割據雖已矣
文采風流今尚存學書初學衛夫人但恨無過王右軍
丹青不知老將至富貴於我如浮雲開元之中常引見
承恩數上南薰殿凌烟功臣少顏色將軍下筆開生面
良相頭上進賢冠猛將腰間大羽箭褒公鄂公毛髮動
英姿颯爽來酣戰先帝天馬五花驄畫工如山貌不同
是日牽來赤墀下迥立闔闔生長風詔謂將軍拂絹素
意匠慘淡經營中斯須九重真龍出一洗萬古凡馬空

玉花却在御榻上榻上庭前屹相向至尊含笑催賜金
圍人太僕皆惆悵弟子韓幹早入室亦能畫馬窮殊相
幹惟畫肉不畫骨忍使驂騮氣凋喪將軍善畫蓋有神
必逢佳士亦寫真即今漂泊干戈際屢貌尋常行路人
途窮反遭俗眼白世上未有如公貧但看古來盛名下
終日坎壈纏其身

古今詩刪卷十二

欽定四庫全書

集部

古今詩刪卷十三至
五

詳校官中書_臣李采

侍讀_臣孫球覆勘

總校官庶吉士_臣倉聖脈

校對官編修_臣盧燧

謄錄舉人_臣郭文懿

欽定四庫全書

古今詩刪卷十三

明 李攀龍 編

唐七言古詩

行路難二首

高適

長安少年不少錢，能騎駿馬鳴金鞭。
五侯相逢大道邊，美人絃管爭流連。
黃金如斗不敢惜，片言如山莫棄捐。
安知憔悴讀書者，暮宿靈臺私自憐。

其二

君不見富家翁舊時貧賤誰比數一朝金多結豪貴百事勝人健如虎子孫成行滿眼前妻能管絃妾能舞自矜一身忽如此却笑傍人獨愁苦東鄰少年安所如席門窮巷出無車有才不肯學干謁何用年年空讀書

邯鄲少年行

高適

邯鄲城南遊俠子自矜生長邯鄲裏千場縱博家仍富幾處報讐身不死宅中歌笑日紛紛門外車馬如雲屯

未知肝膽向誰是
令人却憶平原君
君不見今日交態
薄黃金用盡還疎索
以茲感嘆辭舊遊
更於時事無所求
且與少年飲美酒
往來射獵西山頭

燕歌行

高適

漢家烟塵在東北
漢將辭家破殘賊
男兒本自重橫行
天子非常賜顏色
縱金伐鼓下榆關
旌旆逶迤碣石間
校尉羽書飛瀚海
單于獵火照狼山
山川蕭條極邊土
胡騎憑陵雜風雨
戰士軍前半死生
美人帳下猶歌舞

大漠窮秋塞草腓孤城落日關兵稀身當恩遇常輕敵
力盡關山未解圍鐵衣遠戍辛勤久玉筋應啼別離後
少婦城南欲斷腸征人薊北空回首邊庭颼颼那可度
絕域蒼茫無所有殺氣三時作陣雲寒聲一夜傳刁斗
相看白刃雪紛紛死節從來豈顧勲君不見沙場征戰
苦至今猶憶李將軍

人日寄杜二拾遺

高適

人日題詩寄草堂遙憐故人思故鄉柳條弄色不忍見

梅花滿枝空斷腸
身在遠藩無所預
心懷百憂復千慮
今年人日空相憶
明年人日知何處
一臥東山三十春
豈知書劍老風塵
龍鍾還忝二十石
愧爾東西南北人

漁父歌

高適

曲岸深潭一山叟
駐眼看釣不移手
世人欲得知姓名
良久問他不開口
箬皮笠子荷葉衣
心無所營守釣磯
料得孤舟無定止
日暮持竿何處歸

九月九日酬顏少府

高適

簷前白日應可惜籬上黃花為誰有行子迎霜未授衣
主人得錢始沽酒蘇秦憔悴人多厭蔡澤棲遲世看醜
縱使登高只斷腸不如獨坐空搔首

送田少府貶蒼梧

高適

沈吟對遷客惆悵西南天昔為一官未得意今向萬里
令人憐念茲斗酒成睽間停舟嘆君日將晏遠樹應連
北地春行人却羨南歸鴈丈夫窮達未可知看君不合
長數奇江山到處堪乘興楊柳青青那足悲

賦得還山吟送沈四山人

高適

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨桂花松子常滿地賣藥囊中應有錢還山服藥
又長年白雲勸盡杯中物明月相隨何處眠眠時憶問
醒時事夢魂可以相周旋

送蔡山人

高適

東山布衣明古今自言獨未逢知音識者閱見一生事

到處豁然千里心
看書學劍長辛苦
近日方思謁明主
斗酒相留醉復醒
悲歌數年淚如雨
丈夫遭遇不可知
買臣主父皆如斯
我今蹭蹬無所似
看爾崩騰何苦為

寄宿田家

高適

田家老翁住東陂
說道平生隱在茲
髮白未曾記日月
山青每到識春時
門前種柳深成巷
野谷流泉添入池
牛壯日耕十畝地
人閒常掃一茆茨
客來滿酌清樽酒
感興平吟才子詩
岩際窟中藏鼯鼠
潭邊竹裏隱鸕鷀

村墟日落行人少醉後無心怯路岐今夜只應還寄宿
明朝拂曙與君辭

封丘縣

高適

我本漁樵孟諸野一生自是悠悠者乍可狂歌草澤中
寧堪作吏風塵下祇言小邑無所為公門百事皆有期
拜迎官長心欲碎鞭撻黎庶令人悲悲來向家問妻子
舉家盡笑今如此生事應須南畝田世情付與東流水
夢想舊山安在哉為銜君命日遲迴乃知梅福徒為爾

轉憶陶潛歸去來

登古鄴城

岑參

下馬登鄴城城空復何見東風吹野火暮入飛雲殿城隅南對望陵臺漳水東流不復回武帝宮中人去盡年年春色為誰來

韋員外家花樹歌

岑參

今年花似去年好去年人到今年老始知人老不如花可惜落花君莫掃君家兄弟不可當列卿御史尚書郎

朝回花底恒會客
花撲玉缸春酒香

秦箏歌送外甥蕭正歸京

岑參

汝不聞秦箏聲最苦
五色纏絃十三柱
怨調慢聲如欲語
一曲未終日移午
紅亭水木不知暑
忽彈黃鍾和白紵
清風颯來雲不去
聞之酒醒淚如雨
汝歸秦兮彈秦聲
秦聲悲兮聊送汝

胡笳歌送顏真卿使赴河隴

岑參

君不聞胡笳聲最悲
紫髯綠眼胡人吹
吹之一曲猶未

了愁殺樓蘭征戍兒涼秋八月蕭關道北風吹斷天山
草崑崙山南月欲斜胡人向月吹胡笳胡笳怨兮將送
君秦山遙望隴山雲邊城夜夜多愁夢向月胡笳誰喜
聞

太白胡僧歌

岑參

聞有胡僧在太白蘭若去天三百尺一持楞伽入中峯
世人難見但聞鐘窗邊錫杖解兩虎床下鉢盂藏一龍
草衣不針復不線兩耳垂肩眉覆面此僧年幾那得知

手種青松今十圍心將流水同清淨身與浮雲無是非
高山老人已曾識願一見之何由得山中有僧人不識
城裏看山空黛色

崔五六圖屏風各賦一物得烏孫佩刀

李頎

烏孫腰間佩兩刀刃可吹毛錦為帶握中枕宿穹廬室
馬上割飛翳螭塞執之魍魎誰能前氣凜清風沙漠邊
磨用陰山一片玉洗將胡地獨流泉主人屏風寫奇狀
鐵鞘金環儼相向回頭瞪目時一看使予心在江湖上

別劉鎰

李頎

梁生個儻心不羈途窮氣蓋長安兒
回頭轉盼侶雕鷄
有志飛鳴人豈知雖云四十無祿位
曾與大軍掌書記
抗辭請刃誅部曲作色論兵犯二帥
一言不合龍額侯
擊劒拂衣從此棄朝朝飲酒黃公壚
脫帽露頂爭叫呼
庭中犢鼻昔常挂懷裏琅玕今在無
時人見子多落魄
共笑狂歌非遠圖忽然遣躍紫騮馬
還是昂藏一大夫
洛陽城頭曉霜白層氷峨峨滿川澤
但聞行路吟新詩

不嘆舉家無僦石莫言貧賤長可欺覆簣成山當有時
莫言富貴長可託木槿朝看暮還落不見古時塞上翁
倚伏由來任天作去去滄波勿復陳五湖三江愁殺人

洛陽女兒行

王維

洛陽女兒對門居纔可容顏十五餘良人玉勒乘驄馬
侍女金盤膾鯉魚畫角朱樓盡相望紅桃綠柳垂簷向
羅帷送上七香車寶扇迎歸九華帳狂夫富貴在青春
意氣驕奢劇季倫自憐碧玉親教舞不惜珊瑚持與人

春窗曙滅九微火九微片片飛花璫戲罷曾無理曲時
粧成祇是薰香坐城中相識盡繁華日夜經過趙李家
將憐越女顏如玉貧賤江頭自浣紗

答張五弟

王維

終南有茅屋前對終南山終年無客長閉關終日無心
長自閒不妨飲酒復垂釣君但能來相往還

寄崇楚僧

王維

崇楚僧崇楚僧秋歸覆釜春不還落花啼鳥紛紛亂澗

戶山窗寂寂閒峽裏誰知有人事郡中遙望空雲山

孟門行

崔灝

黃雀銜黃花翩翩傍簷隙本擬報君恩如何反彈射金
罍美酒滿座春平原愛才多衆賓滿堂盡是忠義士何
意得有讒諛人諛言反覆那可道能令君心不自保北
園新栽桃李枝根株未固何轉移成陰結實君自取若
問傍人那得知

代閨人答輕薄少年

崔灝

妾家近隔鳳凰池粉壁紗窗楊柳垂本期漢代金吾壻
誤嫁長安遊俠兒兒家夫婿多輕薄借客探九重然諾
平明挾彈入新豐日晚揮鞭出長樂青絲白馬冶遊園
能使行人駐馬看自矜陌上繁華盛不念閨中花鳥闌
花間陌上春將晚走馬關雞猶未返三時出望無消息
一去那知行近遠桃李花開覆井欄朱樓落日捲簾看
愁來欲奏相思曲抱得秦箏不忍彈

行路難

崔灝

君不見建章宮裏金明枝萬萬長條拂地垂二月三月
花如霰九重深幽君不見艷彩朝含四寶宮香風吹入
朝雲殿漢家宮女春未闌愛此芳草朝暮看看來看去
心不忘攀折將安鏡臺上雙雙素手剪不成兩兩紅粧
笑相向建章昨夜起春風一花飛入長信宮長信麗人
見花泣憶此珍樹何嗟及我昔初在昭陽時朝攀暮折
登玉墀只言歲歲長相對不悟今朝遂相思

送王七尉松滋

孟浩然

君不見巫山神女作行雲
霏紅沓翠曉氛氲
嬋娟流入襄王夢
倏忽還隨零雨分
空中飛去復飛來
朝朝暮暮下陽臺
愁君此去為仙尉
便逐行雲去不回

餘杭醉歌贈吳山人

丁仙芝

曉幙紅襟驚春城
白項烏只來梁上
語不向府中趨城
頭坎坎鼓聲曙
滿庭新種櫻桃樹
桃花昨夜撩亂當
軒發色映樓臺
十千允得餘杭酒
二月春城長命杯
酒後留君待明月
還將明月送君回

長歌行

劉復

淮南木落秋雲飛
楚宮商歌今正悲
青春白日不與我
當壚舉酒勸君持
出門驅馳四方事
徒用辛勤不得意
三山海底無見期
百齡世間莫虛棄
君不見金城帝業
漢家有東制諸侯
欲長久姦雄竊命
風塵昏函谷重關
不能守龍蛇出沒
經兩朝胡虜憑陵
大道銷河水東流
宮闕盡五陵松柏
自蕭蕭

登戲馬臺作

儲光羲

君不見宋公杖鉞誅燕后英雄踴躍爭趨走小會衣冠
呂梁壑大徵甲卒礪礪口天門神武樹元勳九日茱萸
饗六軍泛泛樓船遊極浦搖搖歌吹動浮雲居人滿目
市朝變霸業猶存齊楚甸泗水南流桐栢川沂山北走
瑯琊縣滄海沉沉晨霧開彭城烈烈秋風來少年自言
未得意日暮蕭條登古臺

贈喬琳

張謂

去年上策不見收今年寄食仍淹留羨君有酒能便醉

羨君無錢能不憂如今五侯不待客羨君不入五侯宅
如今七貴方自尊羨君不過七貴門丈夫會應有知己
世上悠悠安足論

湖中對酒作

張謂

夜坐不厭湖上月晝行不厭湖上山眼前一樽又長滿
心中萬事如等閒主人有黍萬餘石濁醪數斗應不惜
即今相對不盡歡別後相思復何益茱萸灣頭歸路賒
願君且宿黃公家風光若此人不醉參差辜負東園花

城傍曲

王昌齡

秋風鳴桑條
草白狐兔驕
邯鄲飲來酒
未消城北原
平掣皂鵬
射殺空營
兩騰虎迴
身却月佩
弓鞘

烏棲曲

王昌齡

白馬逐牛車
黃昏入狹斜
狹斜柳樹烏
爭宿爭枝
未得飛上
屋東房
少婦壻從
軍每聽烏
啼知夜分

對酒吟

崔國輔

行行日將夕
荒村古塚
無人跡
蒙籠荆棘
一鳥鳴
屢唱

提壺沽酒喫古人，不達酒不足遺恨。
精靈傳此曲，寄言世上諸少年。
平生且盡杯中醪。

巴陵寄李二戶部張四禮部

賈至

江南芳草初冪冪，愁殺江南獨愁客。
秦中楊柳也應春，轉憶秦中相憶人。
萬里鶯花不相見，登高一望淚沾巾。

觀于舍人壁畫山水

王季友

野人宿在山家，少朝見此山。
謂山曉半壁，仍栖嶺上雲。
開簾欲放湖中鳥，獨坐長松是阿誰。
再三招手起來遲。

于公大笑向余說小弟丹青能爾為

古興

常建

輓轡井上雙梧桐飛鳥銜花日將夕深閨女兒莫愁年
玉指泠泠怨金碧石榴裙裾蛺蝶飛見人不語顰蛾眉
青絲素絲紅絲絲織成錦衾當為誰

宿洄溪翁宅

元結

長松萬株繞茆舍怪石寒泉近簷下老翁八十猶能行
將領兒孫行時稼吾羨老翁居處幽吾愛老翁無所求

時俗是非何足道得似老翁吾即休

洪州客舍寄柳博士芳

薛業

去年燕巢主人屋今年花發路傍枝年年為客不到舍
舊國存亡那得知胡塵一起亂天下何處春風無別離

雜感 鮑防

漢家海內承平久萬國戎王皆稽首天馬常銜苜蓿花
胡人歲獻蒲萄酒五月荔枝初破顏朝辭象郡夕函關
鴈飛不度桂陽嶺馬走先過林邑山甘泉御果垂仙閣

日暮無風香自落
遠物皆重近皆輕
鷄雖有德不如鶴
新安送陸澧歸江陰
劉長卿
新安路人來去早
潮復晚潮明日知
何處潮水無情亦
解歸自憐長在新
安住

長沙贈衡岳祝融峯般若禪師
劉長卿

般若公般若公
負鉢何時下祝融
歸路却看飛鳥外
禪房空掩白雲中
桂花寥寥閒自落
流水無心西復東

八桂渚次砂牛石穴
劉長卿

扁舟傍歸路日暮瀟湘深湘水清見底楚雲淡無心片
帆落桂渚獨夜依楓林楓林月出猿聲苦桂渚天寒桂
花吐此中無處不堪愁江客相看淚如雨

聽笛歌留別鄭協律

劉長卿

舊遊憐我長沙謫載酒沙頭送遷客天涯望月自沾衣
江上何人復吹笛橫笛能令孤客愁綠波淡淡如不流
商聲寒亮羽聲苦江天寂歷江楓秋靜聽闌山聞一叫
三湘月色悲猿嘯又吹楊柳激繁音千里春色傷人心

隨風飄向何處落唯見曲盡平湖深
明發與君離別後
馬上一聲堪白首

賦得青城山歌送楊杜二郎中赴蜀軍

錢起

蜀山西南千萬重仙經最說青城峯
青城嶽峯倚空碧
遠壓峨眉吞劒壁錦屏雲起易成霞
玉洞花明不知夕
星臺二妙逐王師阮瑤軍書王粲詩
日落猿聲連玉笛
晴來山翠傍旌旗綠蘿春月營門近
知君對酒遙相思

郢州西樓吟

郎士元

連山盡處水縈迴
山上城門臨水開
朱闌直下一百丈
日暖遊鱗自相向
昔人愛險閉層城
今人愛閒江復清
沙洲楓岸無來客
草綠花紅山鳥鳴

聽杜山人彈胡琴

戎昱

綠琴胡笳誰妙彈
山人杜陵董庭蘭
董君少與山人友
山人別來今已久
當時海內求知音
囑付胡琴在君手
杜陵工琴四十年
琴聲在音不在絃
座中為我奏此曲
滿堂蕭瑟如窮邊
第一第二拍淚盡
蛾眉落番客更聞

出塞入塞聲窮廬氍帳難為情胡天雨雪四時下五月
不曾芳草生須臾促軫變宮徵一聲悲兮一聲喜南看
漢月雙眼明却顧胡兒寸心死回紇數年收洛陽洛陽
士女皆驅將豈無父母與兄弟聞此哀情皆斷腸杜陵
先生證此道沈家祝家皆絕倒如今世上風雅哀若箇
深知此聲好世上愛箏不愛琴誰明此調難知音今朝
促軫為君奏不向俗流傳此心

野田行

李益

日沒出古城野田何茫茫寒狐嘯青塚鬼火燒白楊昔
人未為泉下客行到此中曾斷腸

越裳操

韓愈

雨之施物以孳我何意於彼為自周之先其艱其勤以
有疆宇私我後人我祖在上四方在下厥臨孔威敢戲
以侮孰荒于門孰洽于田四海既均越裳是臣

履霜操

韓愈

父兮兒寒母兮兒飢兒罪當笞逐兒何為兒在中野以

宿以處四無人聲誰與兒語兒寒何衣兒飢何食兒行
于野履霜以足母生衆兒有母憐之獨無母憐兒寧不
悲

汴州亂二首

韓愈

汴州城門朝不開天狗墜地聲如雷健兒爭誘殺留後
連屋累棟燒成灰諸侯咫尺不敢救孤士何者自興哀

其二

母從子走者為誰大夫夫人留後兒昨日乘車騎大馬

坐者起趨乘者下廟堂不肯用干戈嗚呼奈汝母子何

醉題沈子明壁

白居易

不愛君家十叢菊不愛君家萬竿竹愛君簾下唱歌人
色如芙蓉聲如玉我有陽關君未聞若聞亦應愁殺君

春江花月夜

張若虛

春江潮水連海平海上明月共潮生滌滌隨波千萬里
何處春江無月明江流宛轉遠芳甸月照花林皆似霰
空裏流霜不覺飛汀上白沙看不見江天一色無纖塵

皎皎空中孤月輪江畔何人初見月江月何年初照人
人生代代無窮已江月年年望相似不知江月照何人
但見長江送流水白雲一片去悠悠青楓浦上不勝愁
誰家今夜扁舟子何處相思明月樓可憐樓上月徘徊
應照離人妝鏡臺玉戶簾中卷不去擣衣砧上拂還來
此時相望不相聞願逐月華流照君鴻鴈長飛光不度
魚龍潛躍水成文昨夜閒潭夢落花可憐春半不還家
江水流春去欲盡江潭落月復西斜斜月沈沈藏海霧

碣石瀟湘無限路不知乘月幾人歸
落月搖情滿江樹

鄴城引

張鼎

君不見漢家失統三靈變
魏武爭雄六龍戰
盪海吞江制中國
迴天運斗應南面
隱隱都城紫陌開
迢迢分野黃星見
流年不駐漳河水
明月俄終鄴國宴
文章猶入管絃新
帷座空銷狐兔塵
可惜望陵歌舞處
松風四面笑愁人

吳宮怨

衛萬

君不見吳王宮閣臨江起不捲珠簾見江水曉氣晴來
雙闕間潮聲夜落千門裏勾踐城中非舊春姑蘇臺下
起黃塵祇今惟有西江月曾照吳王宮裏人

木蘭歌

韋元甫

唧唧復唧唧木蘭當戶織不聞機杼聲唯聞女歎息問
女何所思問女何所憶女亦無所思女亦無所憶昨夜
見軍帖可汗大點兵軍書十二卷卷卷有爺名阿爺無
大兒木蘭無長兄願為市鞍馬從此替爺征東市買駿

馬西市買鞍韉南市買轡頭北市買長鞭旦辭爺娘去
暮宿黃河邊不聞爺娘喚女聲但聞黃河流水鳴濺濺
旦辭黃河去暮至黑山頭不聞爺娘喚女聲但聞燕山
胡騎鳴啾啾萬里赴戎機關山度若飛朔氣傳金柝寒
光照鐵衣將軍百戰死壯士十年歸歸來見天子天子
坐明堂策勲十二轉賞賜百千強可汗問所欲木蘭不
用尚書郎願馳千里足送兒還故鄉爺娘聞女來出郭
相扶將阿妹聞姊來當戶理紅粧小弟聞姊來磨刀霍

霍向猪羊開我東閣門坐我西閣床脫我戰時袍著我
舊時裳當宵理雲鬢挂鏡貼花黃出門看火伴火伴始
驚惶同行十二年不知木蘭是女郎雄兔脚撲朔雌兔
眼迷離雙兔傍地走安能辨我是雄雌

賦得三峽流泉歌

李冶

妾家本住巫山雲巫山流泉常自聞玉琴奏出轉寒
宜似當時夢中聽巫峽迢迢幾千里一時流入幽閨裏
巨石崩崖指下生飛波走浪絃中起初疑噴怒含雷風

又似嗚咽流不通
回湍曲瀨勢將盡
時復滴瀝平沙中
憶昔阮公為此曲
能令仲容聽不足
一彈既罷還一彈
願比流泉鎮相續

古今詩刪卷十三